



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

f Tir Yimiyim


tiryimiyim@aolima

tir yimiyim

TAPAK 7

Kobe Bryant Basketball Hall of Fame nung züngoksemogo

PM Modi aitsürtem apuba anema Congress lenirtemi ola adoker



VOL. XVIII NO. 212 (ADOK 212) DIMAPUR

TENTONÜ (MONDAY)

MONUPII (MAY) 17, 2021

₹ 5.00

COVID-19 Nagaland: Nisung 241 dak puteta 18,000 adenogo

Kohima, May 16, 2021 (TYO): Deobarnü Nagaland nung nisung 241 dak COVID-19 putetba züngsema nisung 18,000 adenogo.

"Tanü nisung 241 dak COVID-19 putet. Parnokji Kohima nung 103, Dimapur nung 102, Mokochung nung 14, Longleng nung 10, Zunheboto nung 5, Phek nung 3 aser Mon, Kiphire, Tuensang o Peren nung kaka (1) lir" ta Health & Family Welfare Minister, S Pangnyu Phom-i metetdaksü.

"Maneni, COVID-19 puteta alir nisung 108 taneptsü nguogo. Parnokji Dimapur nung 58, Kohima nung 36, Mon nung 6, Longleng nung 4, Phek nung 3 aser Mokochung nung 1 lir" ta

Pangnyu-isa ashi.

Tanü putetertem züngsema nisung ajak agi 18,076 kümogo aser parnok rongnungi 13,195 taneptsü nguogo aser tang 4,100 anepaludar, ta paisa metetdaksü.

Deobarnü COVID-19 puteta alir nisung 13 asüba züngsema tasür ajak agi nisung 209 kümogo. Ajisüaka, tasürtem rongnung nisung 11 bo tanga tashidak ajanga asü, ta Minister Pangnyu-isa ashi.

"Honibar tashi nung Nagaland nung COVID-19 alitsü akok ta temolung melemi bilemba sample 1,72,161 tendangogo. RT-PCR ajanga 83,716, TrueNat ajanga 51,567 aser Rapid Antigen Test ajanga 36,878 tendang," ta State Nodal Officer Dr Nyanthung Kikon-ia metetdaksü.

Tanü Nagaland nung mezüngbuba PSA plant lapoktsü

Kohima, May 17, 2021 (TYO): Hombarnü Nagaland nung mezüngbuba Pressure Swing Adsorption (PSA) oxygen generation plant lapoktsü aser iba ya PMCARES Fund ajanga yangluba lir.

"Naga Hospital Authority Kohima (NHAK) nung Nagaland Health & Family Welfare Minister, S Pangnyu Phom-i PSA plant lapoktsü aser iba sülen nungi medical oxygen yanglutsü," ta Health & Family Welfare Department Joint Director, Dr Neisakho Kere-ia ashi.

NHAK nung PSA Plant ajanga yangluba oxygen indang sample May 10 nü tendangtsü

atema yok aser May 13 nungi quality test tenzükba Hokolbarnü tembangogo" ta Dr Kere-isa ashi.

"Medical oxygen indang sample tendangba nung IP 2018 Standard Quality aser Medical Purposes atema amshitsü tajung ta FARE LABS Private Limited, Gurgaon nung Director D Mathur-i sign asüba test result nung shia lir, ta paisa metetdaksü.

Maneni, Dimapur aser Mokochung district nung PSA plant ana yangludar aser tanga district tem nunga UNDP aser UNICEF ajanga teyari agüja PSA oxygen generation plant tem yanglutsü.

Mizoram sorkari COVID-19 atema research team tentettsü

Aizawl, May 16, 2021 (Agencies): Mizoram sorkari COVID-19 wara tanabuba tajungba metettsü aser bushisüngdangtsü atema research telok ka tentettsü.

Iba telok nung medical experts aser scientists adentsü.

Health, Disaster management & rehabilitation department, police ketdangsurtem aser Zoram Medical College (ZMC), Indian Medical Association (IMA) aser Non-Government Hospital Association nungi teshimtet nübotem senden ka amendang iba telemetba agi. Senden nung mendenji health minister Dr Lalthangliana liasü.

Yaküm COVID-19 mezüng wara nung majangshidangba aika taküm ajangshir anungji iba wara jungjunga asadanga bushitsü aser

tali tejanga nung metettsü atema luden ka tentettsü lemet, ta state sorkari ashi.

Iba research telok nung Integrated Disease Surveillance Programme (IDSP), IMA, ZMC aser Mizoram University (MZU) mongintem adentsü.

"COVID-19 wara tanabuba ya mezüng dang nungi khenyongi balaka lir, anungji scientific study aser research jungjunga asütsü nüngdaker" ta Minister Lalthangliana-ia ashi.

"Taküm April 1 nungi May 14 tashi nung Mizoram nung nisung 4023 dak COVID-19 puteta liasü. Parnok rongnung nisung 1,173 ainlen senzüba kulitem liasü saka tanünga nisungtem jibo ainleni maortem dang liasü" ta state nodal officer, IDSP Dr. Pachau Lalmalsawma-ia ashi.

Nagaland nung COVID-19 puteter 61% Dimapur nungi lir



Tanü Dimapur leper nung Covid agi asüba mang ka aremba noksa nung angur. Akhi ama asüpila sentep sentong magitetter asünung metetba aser akokba tashi sanükkertemi pei san asüba mozü kidang mesüra leper nung oagi sarasadem mapang agir remdaksür. (Dimapur, May 16, 2021).

Dimapur, May 16, 2021 (TYO): Nagaland nung Covid-19 putetertem rongnung 61% ji Dimapur district kija nungi lir anungji asenoki tang dang nungi tensa tamajungba ajurutsü atema renema atatsüla, ta Y. Kikheto Sema IAS-i ashi.

Y. Kikheto ya Dimapur nung Covid-19 dak sendakba maparen atema Nodal officer lir.

"Sorkar aser nija mozü kitem nung yipden aser oxygen agi meperi kümogo anungji talila nüngdaker," ta Kikheto-isa ashi.

Kanga rongdak nüngdakba atema May 16, 2021 nü Y. Kikheto Sema IAS aser Commissioner Police Dimapur Rothihu Tetseo nati anir Team Dimapur-i Olive Hospital Dimapur semdang aser

Director Ikheto Sema den ajuruteper Olive Hospital nung non-Covid shirangertem anioka anepaluba atema Kikheto-i pelaba metetdaksü.

Olive Hospital nung yipden 70 dang lir aser ajak nung shirangertem mongdang. Ajisüaka, Covid agi shirangertem anepalutsü nüngdakba agi Kikheto Sema-i Director Ikheto dang mozü ki tesülen yipden 30 aliba make shift camp ka taruba hopta tashi nung yanglutsü atema mepishi.

Eden Hospital nung yangluba ama Olive hospital nung Indian Army indnag teyari meshia yanglutsü atema Kikheto-i district administration nem tetuyuba agütsü.

Team Dimapur-isa Nikos Hospital semdang aser Dr Vickto Wotsa den ajuruteper sensaksem.

Dr Vickto ya Private Doctors Association Dimapur nung President lir aser private Doctor temi Covid wara nung yaritepba atema Kikheto-i pelaba metetdaksü.

Dr. Vickto-i Nikos Hospital Covid agi shirangertem anepalutsü atema yipden 15 renemdar aser ibaji asüng tashi nung lapoktsü, ta Kikheto-ia ashi.

Team Dimapur-i mozü ki balala den yaritepa anogo pezü tsüngda Covid yipden 58 yangluogo. Christian Institute of Health Sciences and Research (CIHSR) nung yipden 76 aliba nung 28 bendenlokogo, Zion Hospital nung yashi yipden 10, Faith Hospital nung yipden 41 aliba nung 10 bendenlok aser Eden Hospital nung yipden 10 renemogo.

Maneni, asüng (May 17) Eden Hospital nung yipden 45 aser Nikos Hospital nung yipden 15 bendenloktsü.

Kikheto-isa Police Referral Hospital Chumukedima nung Covid yipden 30 yanglutsü atema tetuyuba agütsüogo.

Dimapur nung mozü ki ajak nungi teyari agia inyakyonga yipden aser oxygen nüngdakba ama meperitsür, anungji nisungtem pei pei kidang emergency atema oxygen yua alibatem mamshii meyui nisung takümtem kümzüksü asoshi khen atema agütsütsü mepishir, ta Kikheto-isa ashi.

Cyclone Tauktae ajanga nisung 6 asü; Tanü Gujarat atongtsü

New Delhi, May 16, 2021 (Agencies): Deobar nungi Cyclone Tauktae ajanga Kerala, Karnataka aser Goa nung tzünglu kanga arua mopung tesashi aoner aser lendong balala nung nisung 4 asüba osang angazüker.

Tanü Cyclone Tauktae ajanga kiojen aika rakatsüogo, electricity poles aser süngdong aika laodaktsü aser nisung aika pei talidak yutsür tangaleni ogo.

Cyclone Tauktae ya yipru tulu ka kümogo aser taruba ghonda 24 tsüngda tesashiba akümtsü aser Hombar nikongdang Gujarat atongtsü, ta India Meteorological Department (IMD)-i metetdaksüogo.

Gujarat nung tükümlen alir nisung lakh 1.5 shi ka tangaleni anienogo aser National Disaster Response Force (NDRF) o State Disaster Response Force (SDRF) telok 54 tashi mapa

lemzükja lir.

Maharashtra nunga Hombarnü tesem aika nung tzünglu kanga arutsü ta IMD-i ashiba agi renema lir.

Deobarnü Karnataka kübok Uttara Kannada, Udipi, Chikkamagaluru aser Shivamogga district tem nung yipru ajanga lendong balala nung nisung pezü asüba osang lir. Kerala nunga tzünglu kanga aruba ajanga ayongtem nung tzi mesemi ayimer.

Deobarnep nungi Goa nung mopung tesashiba aonba den tzünglu kanga arur aser tesem aika nung electric poles laodaktsüba ajanga power supply mali lir, ta state Power Minister Nilesh Cabral-i osangbener dang ashi.

Goa nung yipru ajanga lendong balala nung nisung 2 süogo aser süngdong 500 den

timba laogo. Maneni, kiojen 200 shi raksaogo aser lenmangtem aika noktanga lir, ta Chief Minister Pramod Sawant-ia ashi.

Cyclone Tauktae ajanga tanü tzünglu kanga aruba den mopung 90 km/per hour tashi aon. May 18, 2021 tashi nungbo mopung 150-160 km nungi 175 km per hour tashi aontsü akok, ta IMD indang Cyclone Warning Division ajanga metetdaksüogo.

Cabinet Secretary Rajiv Gauba-i aniba National Crisis Management Committee (NCMC) pur tanü New Delhi nung senden ka menogo aser idangji Cyclone Tauktae ajanga kongshiba tesemtem nung COVID hospitals inyakyim nung timtem melidaktsütsü aser nisung takümtem melaludaktsütsü atema ketdangsurtem aser department balala nem tetuyuba agütsüogo.

Centre-i anogoshia ration dokan lapoktsü tuyur

New Delhi, May 16, 2021 (Agencies): Centre-i Deobarnü state sorkar ajak dang ration dokan anogoshia mapang talanglang lapoktsü atema tetuyuba agütsüogo.

State/UT kar nung Covid-19 tenokdangba ajanga ration dokan lapokba mapang ajema akümba


nung ajemdaker Centre-i tanü iba tetuyuba agütsü.

"State/UT kar nung Fair Price Shop (FPS) lapoktsü mapang ajemtsüba atema May 15, 2021 nü anogoshia FPSs lapoktsü atema tetuyuba agütsüogo" ta Union Food Ministry-i sangdong ka nung ashi. NFSA den PMGKAY scheme

kübok jangotsü agütsütsü atema ration dokan ajak anogoshia aser anogo piyong lapoktsü atema Centre-i metetdaksü.

Ration agütsüba aser agizükdang nisung o nisung tsüngda tepila ayutsüla aser COVID-19 inyakyim ajak sülen anidaktsüla, ta Centre-isa ashi.

Dimapur nung COVID-19 ketdangsürtemi Naga Cemetery semdang



Y.Kikheto Sema IAS den Commissioner of Police, Dimapur, Rothihu Teteo IPS aser ketdangsürtemi Deobarnü Naga Cemetery tasenba semdangba mapang tangokba noksa ka yangi angur.

Dimapur, Monupi/May 16 (TYO): Dimapur district nung COVID-19 dak sendakba ketdangsüa achaayangtsü asoshi Nodal Officer shimteta alisang, Y.Kikheto Sema IAS-i anir Commissioner of Police Dimapur, Rothihu Teteo IPS aser ADC Dimapur, Athoke Aye aser ketdangsürtemi May 16, 2021 nü Zani nung Naga Cemetery tasenba semdanga

COVID-19 virus agi asür nem akum agüja liasü. Dimapur nung COVID-19 agi asür nisung 75 buba aremstü atema bener arua aliba mapang par telok ya tonga aru. Leper nung Pastor/Reverend maliba ngua Y.Kikheto Sema temolung shirang aser nisung tasü mang marendang sarasademtsü aser kinungertem molung süngzükja liasü.

Sorkari maneni nüburttem kumzuka ayutsü, ta pai ashi. Mapang shidak nung leper amenokba atema Nodal Officer-i Naga Council Dimapur nem tenüngsang agütsü, leper tejenba nungbo iba ama nisung jenti aremstü atema tesem mongutetla, ta ashi. Iba atema pai talisa taoba NCD mendenpuba, Asür Ghokheto Chopy aser ali tenlartem dang pelaba metetdaksü, koba agi COVID-19 timtem mapang khuret tuluka abener, ta ashi.

Dimapur Municipal Council (DMC) Task Force, SDRF aser Home Guard züngsemtemi COVID-19 tashidak den sendaktepa asürtem anepalua aremba atema Kikheto Sema-i tenüngsang agütsü aser iba mapa ya tasaktiba rongnung ka lir, anungji nüburttemi tenüngsang agütsütsü langa lir, ta ashi. COVID-19 agi asürtem aremba nung shilem agir DMC aser SDRF züngsemtem nem Western Sumi Hoho ajanga senotsü teyari agütsütsü lemetetba atema pai pelaba lemsatepa liasü.

Meghalaya nung ghonda 24 tsüngda COVID-19 agi nisung 19 asü

Shillong, Monupii/May 16 (Agencies): Meghalaya nung tesüiba ghonda 24 tsüngda COVID-19 agi nisung 19 asü aser nisung 569 dak iba tashidak putetba osang lir. NHM Meghalaya ajanga Honibarnü Twitter nung, state nung COVID-19 agi asür nisung 320 jungogo, ta shia liasü. Deobarnü nisung tasen 569 dak COVID-19 cases putetba ajanga state nung tang

tashinung nisung 23,332 dak iba virus puteter alitsü. Tang state nung COVID-19 active cases nisung 4,534 lir aser nisung 18,478 taneptsü nguogo, ta osang ka ajanga ashi. Honibarnü Meghalaya nung nisung tasen 560 dak COVID-19 putet aser nisung asür ajak agi 301 liasü. State nung oxygen aliba yipden 568 lir, ta NHM Meghalaya ajanga ashi. Kasa mapang Meghalaya chief minister Conrad K

Sangma-i par nüburttem ajanga dang COVID-19 mozü agitsü ajungshia liasü. "Meghalaya nung arishi küm 18-44 tsüngta aliba nüburttem nem mozü agütsüba maparen May 14, 2021 nü tenzükogo. May 17 nungi May 23, 2021 tashi mozü agitsü atema <http://cwin.gov.in> nung tenüng züluoktsüla. Nüburttem dang mozü agitsü ajungshir," ta CM Sangma-i pa indang Twitter nung Deobarnü zülutsü.

Dimapur nung lockdown mapang dokan shibangba atema azük



(Abelen) Dokan kibur Anil Roy tepo raksar aser (achichi) tim masüba mapa inyaker mejangjaba nisung ana.



Dimapur, Monupii/May 16 (TYO): Lockdown mapang dokan lapoktsü memolungba mechi West Yard area, Dimapur kübok Chatteshwary Colony nung mejangjaba nisung anati dokan kibur ka dak azük, ta osang ajanga ashi. Osang ajanga ashiba agi, dokan kibur Anil Roy dang nisung ana yagi pa indang dokan lapoktsü asüngdang, saka pai memolungba mechi nisung ana yagi Roy tejak nung atsüng aser

pa indang tepo raksatsü. Osangbeneri Anil Roy jabaso Animoy Roy dang iba tatalokba indang osang tejangja asüngdanga liasü. Pai ashiba agi, nisung ana ya par ki telungi aitsü merang aser parnok ya 'checking' aruba ta ashi, saka tenati kuli tejangja magütsütet aser tena civilian süoshi dang agir liasü. "Küboi tena nokdangtsü merangdang tenati pa dak teka agi atsüng aser tejaklen tepo ana

tsüka azü agi temang asüng," ta Animoy Roy-i ashi. Nisung ana yagi tetsü aser teyi nunger matsüngdang tim masüba yimya amshi, ta pai ashi. Iba tatalokba ya police nem osang agütsüba sülen police arua tensa asadanga timtem ajuru alir den asüngdangyaogo, ta pai ashi. Iba osang züluba mapang tashinung police nungi sangdong balaka agüja meliasü.

Th. Muivah-i Neiba Kire asükhu lemsatep

Dimapur, Monupii/May 16 (TYO): Angami Region, GPRN indang Kilonser, Neiba Kire asüba ajanga ni temolung shiranger aser jashir, ta GPRN indang Ato Kilonser Th. Muivah-i asür Neiba Kire kinungtsü Katini Kire dangi shidi ka züluba nung shia liasü. Neiba Kire ya Oking Hospital, Kohima nung May 16, 2021 nü asü. Pa ya Kohima village nungi lir aser pa COVID-19 tongpang raraba mapang asü. Asür Neiba Kire ya temolungtetba tulu nung Naga

linük tenzüktsü tenüng züluok. Pai jenjang balala nungi bendanga agütsür, pai akokba agi tajungtiba nung linük tenzük aruogo aser yamaji ajaki pa mapa temolung süa agizük liasü. Pai mapa tajung inyaka yutsübatem nüburttemi teti bilemtetsü, ta Th. Muivah-i ashi. Naga Nation tenüng nung ni asür kibong den asükhu lemsateper aser Tulusang Tsüngremi asür tanüla teti tatem maka tesunep nung anisüngzükjang ta sarasademtsür, ta pai ashi.

BJP Nagaland indang ST Morcha-i frontline worker nem choiyongtsü agütsü



Kohima, Monupii/May 16 (TYO): BJP Nagaland indang Scheduled Tribe (ST) Morcha ajanga "Seva Hi Sangathan" (Service only is Organization) kübok Honibarnü Kohima district nung frontline worker nem khen chiyongtsü agüja liasü. Iba sentong ya Police Headquarters (PHQ) Junction, Kohima nung State Chief Spokesperson & Incharge of ST Morcha, Kuputo Shohe ajanga tenzüktsü, kong State Spokesperson W. Ngampa Konyak aser State Co-Chief

Spokesperson Nini Cheng nungera dena liasü. Iba ama sentong tajung atema OC South police station Neizhalie. K ajanga BJP Nagaland dang pelaba lemsatepa liasü. Tir Wanphong Konyak-i anir ST Morcha teloki health worker, police, traffic police aser Kohima district administration nung inyaker nem chiyongtsü talep (package) 110 lema agüja liasü. Kasa mapang frontline worker temi anibelem mesasai nüburttemi tenzükba atema ST Morcha, BJP Nagaland ajanga pelaba lemsatepa liasü.

GPRN/NSCN ajanga asükhu lemsatep

Dimapur, Monupii/May 16 (TYO): Tia maka tanü, May 16, 2021 anogo Kilonser Neiba Kire asüba asoshi Naga linüki mang ayimer, ta NSCN/GPRN indang Ministry of Information and Publicity

(MIP) ajanga sangdong ka nung metetdaksü. Asür nem akum agüja May 17 aser May 18, 2021 anogotem Naga nunger nisan tom ka atsüketa ayutsü, ta sangdong ajangasa ashi.

Manipur nung doctor ka COVID-19 nem kokdaksü

Imphal, Monupii/May 16 (Agencies): Jawaharlal Nehru Institute of Medical Sciences (JNIMS), Imphal nung inyaker doctor ka COVID-19 tashidak agi menepa süogo. JNIMS indang surgery department nung senior resident ka ama inyaka alisang doctor ya Honibar aonung asü, ta osang ajanga ashi. Senapati district nungi iba doctor ya tesüiba anogo pongu tashi iba medical college hospital indang COVID-19 ward nung oxygen inoker anepalua arua liasü. Iba medical college nung COVID-19 agi doctor mezüngbuba asübaji pa ya

alitsü. JNIMS nung doctor aser nurse kar dak COVID-19 tashidak ya puteta lir, ta ketdangsürtem sangdong ka ajanga ashi. JNIMS director Bhimo-i ashiba agi, iba mozüki nung temang majung amungba healthcare worker tem tajungtiba nung anepalur. "JNIMS nung inyaker nisung 40 shi COVID-19 agi menepa lir. Item rongnung nisung 9 tang temang anepaluba mapang lir aser tanüngertem taneptsü nguogo. Parnok nem chiyongtsü, mozü aser danga achi-ajemtsütem agütsür," ta pai ashi.



May 15, 2021 nü Arunachal Pradesh kübok Pasighat nung 'Friends of Eighties' (FoE)-i Bakin Pertin General Hospital (BPGH) nung Covid-19 agi shirangertem yaritsü atema oxygen cylinders 15 agütsüdang agiba noksa angur. Iba sentong nung Pasighat East MLA aser FoE züngsem Kaling Moyong-i tongti tesemdanger ama shilem agia liasü.

Agartala Orphanage ka nung tanur 36 dak COVID-19 putet

Agartala, May 16, 2021 (Agencies): Tripura kübok Orphanage ka nung alir tanur 36 dak COVID-19 putet.

Jawaharlal Nehru Valika Niwas, Agartala nung tanur tetsür 36 dak COVID-19 tashidak putetogo.

Agartala nung lapoka aliba Jawaharlal Nehru Valika Niwas ya sorkar ajanga achaayanga lapokba orphanage ka lir.

Iba orphanage nung Covid-19 tashidak puteta alir tetsürtem ya arishi küm 7 nungi 16 tsünda lir. Tang parnok ajak isolation nung lir aser parnok temang tajungba lir, ta health ketdangsür kati ashi.

Tanurtem tsünda iba tesashi

wara kanga menatepa aoba asadangteta Tripura sorkari Hombarnü nungi temzüng akangshitsü telemtetba agiogo.

Nübur tsünda Covid19 tashidak putetba timba akümba asadangteta Tripura sorkari May 17, 2021 (Hombar) anepdang 5:00 ako nungi tenzüka taruba anogo 14 tashi Agartala Municipal Corporation (AMC) tesemtem nung curfew amenoktsü telemtetba agir.

Honibar nikongdang osangbener den jembiba mapang State Secretariat nungi otongdar kati, Covid-19 wara prokba azioktsü asoshi AMC indang ward ajunga

nung curfew benoktsü atema State Executive Committee-i telemtetba agiogo ta ashi.

"Tesüiba anogo 14 nungi Tripura anüolen nütsüng shilem 70 dak tema iba tashidak putetba graph ajanga sayuogo aser iba virus prokba ya teblemtsü tulu ka kümogo. Iba district, kong AMC indang shilem tuluka dena lir, tesüiba anogo ana tsünda positive case 1001 nungi iba tesem nung nisung 502 dak iba tashidak putetba osang ajanga angazükogo aser iba ya kanga dang tarendaktsüka lir," ta otongdarisa ashi.

AMC kübok ward 49 nungi nisung lakh 6 jungnüa lir.

Digboi nung grenade pokloktsüba ken o nung nisung ka apu

Guwahati, May 16, 2021 (Agencies): Tesüiba anogo ana tejakdang Digboi nung grenade pokdaktsüba ken o nung police-i bushisüngdanga arudang nisung ka puogo.

Iba nisung ya Dipen Saikia ta jangjaogo.

Hokolbarnü Digboi kübok Tingrai Bazaar nung grenade pokdaktsüba maparen nung shilem agiogo ta temolung meleme bilemba atema Tamuli Bongaon, Digboi nungi police-i Dipen Saikia apu.

Iba ken o dak sendakba nung police-i ano nisung kar dang

astüngdangyadar. Tinsukia police-isa motorcycle nung oya alir nisung ana indang noksa sayaogo.

Motorcycle nung mener oya aliba nisung ana indang osang metetdaksüra/agütsüra pa/la nem sen lakh 2 senpet agütsütsü ta Tinsukia police-isa metetdaksüogo.

Tingrai Bazaar nung grenade pokdaktsüba ken o nung nisung ana ya bushidar ta police-isa ashi.

Tinsukia nung Digboi police station kübok Tingrai indang shishilembaba tesem nung

atalokba bomb lendong nung nisung ana asü aser ana yiru.

Iba lendong nung taküm samar anaji arishi küm 25 tain Sanjit Singh aser arishi küm 22 tain Surajit Talukdar na liasü. Tenaprongla ya Tingrai nungi liasü.

Assam chief minister Himanta Biswa Sarma-i iba ama maparen ajanga tai malir taküm ana tashi samatsüba aitsüogo.

"Iba maparen nung dena alir anema onoki mera tapet agi temerenshi tulu agütsütsü," ta chief minister Sarma-i ashi.

ULFA (I)-i ita 3 ceasefire alitsü metetdaksür

Guwahati, May 16, 2021 (Agencies): United Liberation Front of Asom-Independent (ULFA-I)-i Honibar nungi tenzüka ita asem tashi ceasefire alitsü osang metetdaksüogo.

"Coronavirus tensa ajanga ULFA (I)-i tanü nungi tenzüker taruba ita asem tashi military operations ajak anena atatsü Assam nung lisopurtem dang metetdaksür" ta ULFA (I) commander-in-chief (C-in-C) Paresch Baruah-i metetdaksü.

"Police ketdangsür kar densema nisung kari ULFA (I) anema tasa atonga inyaker aser tenüng menüksütsü meranger. Talisa emergency mapang ka nung parnoki iba mapa inyaker" ta Paresch Baruah-i sangdong ka nung ashi.

Assam Chief Minister

Himanta Biswa Sarma-i ULFA (I) tanishir Paresch Baruah dang yimjung olemtep nung adentsü atema mepishiba sülen anogo ishika lir tanü ceasefire osang metetdaksüogo.

"ULFA den olemteptsübaji anatsülen nungi lenji aruteptsüla. Paresch Baruah-i lenji arutsüla aser kasaji onoki pa dangi aotsü. Telok anaprongi molungtetra tongteprateptsü tasak masü" ta CM Sarma-i ashi.

Hokolbarnü Tinsukia district kübok Tingrai Bazar nung grenade ka apokdak nisung ana asü aser ana yirua liasü.

ULFA (I)-i iba nung parnok shilem kecha mali ta shiogo saka police ketdangsürtemibo ULFA (I)-i grenade pokdaktsü ta temolung malemer.

Manipur nung aonsotsü indang mobile app ka sayaogo

Imphal, May 16, 2021 (Agencies): Manipur nung COVID-19 atema curfew agüja alidang nisungtemi aonsotsü alitetsü atema Chief Minister N Biren Singh-i smartphone application ka sayatsüogo.

MOMA market mobile application ji www.momamarket.com nungi download asütsü akok aser kobi melii Google Play store nunga angutsü. Maneni, iOS version ka yanglutsü, ta CM office ajanga metetdaksü.

Manipur nung COVID-19 azioktsü atema district tenet-Imphal West, Imphal East, Thobal, Kakching, Bishnupur, Churachandpur aser Ukhrul nung curfew ozüng agüja lir.

Chief Minister ketdangsüba kübok state horticulture & soil conservation department nung

Manipur Organic Mission Agency (MOMA) ajanga iba app yanglu.

MOMA ajanga aonsotsü home delivery asütsü aser aonsotsü raksaa endokba aser COVID-19 menatepba noktangtsü.

MOMA den yaritepba Farmers Producer Companies (FPCs) ajanga alu balala nungi aonsotsü bener arutsü aser department indang cold storage aser warehouses nung ayutsü.

"Nüboritem nem aonsotsü pei kishizüng tonga bener arutsütsü atema MOMA Market mobile App sayatsüba atema pelar. Iba app ya Manipur Organic Mission Agency (MOMA), Dept. of Hort. & Soil Conservation ajanga adoker" ta CM Biren Singh-i metetdaksü.

Itanagar nung lockdown atsülanger



Itanagar, May 16, 2021 (Agencies): Itanagar Capital Region nung ano hopta ana atema lockdown atsülanger.

Itanagar Capital Region (ICR) Deputy Commissioner Talo Potom-i lockdown atsülanger osang sangdong ka nung metetdaksüogo.

Hopta ana tashi atsülanger lockdown ya May 17, 2021 - Hombar anepdang 5:00 ako nungi tenzüka May 31, 2021 nikongdang 5:00 ako tashi maneni akatsü.

Itanagar Capital Region (ICR) nung Covid-19 tashidak puteter timba kümba aoba asadangteta Arunachal Pradesh-i ICR tesem nung ano maneni lockdown atsülanger asoshi telemtetba agi.

Itanagar Capital Region nung Itanagar, Naharlagun aser Banderdewa dena lir.

Itanagar nung lockdown aliba mapang taoba nung sangdongba SOPs sülen nüburtemi anidaktsüla ta DC-isa ashi.

Lockdown mapang nüngdakba osettsüset, aonsotsü aser shi ayokba dokantem anepdang 6:00 ako nungi anüngdang 12:00 ako tashi lapoktsü melar.

Ano külen, nikongdang 2:30 ako nungi anepdang 5am ako tashi nüburtem senzusenbongtsü nokdanger.

Kasa mapang, Arunachal Pradesh nung aonung 6:30 ako nungi anepdang 5:00 ako tashi curfew alitsü.



(Abelen nungi) Ifran Khan, Jushna Deori, Damodar Deori aser Ashis Panika. Assam kübok Biswanath Police nung tanur shibelener nisung pezü apu aser iba mapang police-isa tanur pezü kümzükogo. (Guwahati, May 16)



TIR YIMYIM YIMOBILEM (EDITORIAL)

DIMAPUR TENTONÜ, MONUPII(MAY) 17, 2021

Minister-bai mozü ki aok !

Asenok asoshibo minister-bai pa amongdak mozü ki takdang ajak oka meyutsüa ta angashi nung mamangtsüa akok, saka Mizoram nung power minister, Lalzirliana-i pa amongdak Covid mozü ki takdang ajak okdoka meyutsübaji asenok ajak asoshi tangazüksü aser tatishitsü mapa tajung ka asütsü. Atangji, Mizoram nung dang masü saka tangalen tesem aika nung yimten lenirtemi anir teka mapa inyaksü, tetsüng agi jajaa oagi nübortem alidak libaliro jenjang reprangdangtsü aser akok tashi gari amshiba, süoshi agiba aser chiyongtsü chia-ajemba mapatem ajak nung tongmelang asütsü merangba asenoki angur. Item rongnungji Mahatma Gandhi-i anir tang Delhi chief minister Arvind Kejriwal aser West Bengal chief minister Mamata Banerjee nungertem ya asütsü. Alima kin yimten aser loktiliba nung lenirtem rongnung tangatetba balala telok ana lir; telok kati bilemer, ni lenir aser yimsüsür, anungji ni maotsü aser ne meinyaksü saka parnok aotsüla aser parnoki inyaksüla ta bilema tajung ajak agia anisüngzüker; saka telok katibo, ni lenir aser yimsüsür, anungji ni tama ser aotsüla aser inyaksüla ta bilema talila anibelem agir aser tongpang nung asütsü ka asünunga pa tama asür aser tashidak ka menatsü ka asünunga pa tama menar. Telok ana rongnungji, asenoka koba telok nung teimba dena alitsü amai bilemer? Atangji, tanü asen Naga nung loktiliba nung ita sen tera tulu angutsüsa mesüra government gari nung mener jajatsüsa mapa ka ngutetra, anünga alema atu ama asen dang nungi tuluba bilema asükümba ya asenok tai masü saka mezüng kaketshisatsü angazük dang tangatetba tai agütsüba shisatsü, tang tashi meindoktetter aser memelenshitetter. Küm ishika jakdang, ano tanü ama gari yanglur telok aika madok, Mahendra teloki yangluba Jeep gari dang amshiba mapang, government office nung tekolak aser tulerter kar nem dang state government-i gari agütsü aser government gari numberji NLG (Nagaland Government) agi tenzüka amshi, ibaji tenükshitsüka liasü. Anungji, NLG gari angur tulerterjibo joko mapaa meinyaki anisüngzüka dang alir aser alui aotsü masüji aonunga jangratema mejanger anepdanga tesü dang saker ta bilem aser jembi. Iba jagi tsüraburtem ajaki pei tanurtem dang kaketshisatsü angazükbaji pei lima aser nübortem jenjang tajungba küma tenzüksü asoshi masü, saka teka mapa belema meinyaki ita sen tulu chia NLG gari nung mener senzüsü nükla dang agüja ajungshi. Aji oda, iba mangdang aser tangatetba bener züngtetter aser tuler akümertem, shitakba par tsüraburtemi ashi ama, mapa meinyaki government kidang lia, government gari nung senzüa anisüngzüka alitsü asoshi bilemer, anungji memetetika peisasa pei dang nungi tuluba küma asükümba adoker. Ibayongji, yashi tashi tetsüng agi dang senzüa aliba to tangbo joko tuler kümerji tetsüng agibo mera kata mouli asür. Khen khen pei alidak yimkong nübodoka inyaksü 'social work' ayongzük nunga, tuler aser yimsüsürji ta bilema social work nung shilem agitsü asoshi neck tie mesür, kar nem anüshi amdaktsür arur. Ibaji asangsang asü, odang jilushi (drama) ka aier tasa bilemer. Ibaji tesüngmangtsü, temenünütsü aser tesasatsüka lir. Ajisüaka, iba jaklaji pa mesüra laji tai masü saka tanur asüadang tangatetba tai aliba ya asenoksasa melenshira, asenok den asen lima yabo lasasa tajungba küma melenadoktsü. Tang Covid wara ya, tajung tsütsü bilemdi asübo, asenok dangi tesayur tajung ka aru amai lir, kechiyong iba yagi asenok dang mozü kitem shitak junga ayutsüba senbo mashimashi tamshi ta ashir ama angashir. Aji oda, Covid Hospital nungbo shirangertem rongnung nisung kar shimteta VIP akümtsü makoker, anungji nenoki amshiba VIP sobaliba ya endoker nisung shiai yimkong ajungtsü bilema inyakang ta ajungshir amatoa angatetter. Atangji, nisung kari VIP sünüra pa mesüra la jagi anir tang amaji asen lima kong janaa lir, aji aok tenzüksüla aser kong raksaa lir, pei nübo aser rongsen agi yanglushi tenzüksüla aser state rongsen chitsür masü saka tagütsür aser tebushitsür asütsü tim, kechiyong pa mesüra lajang ajak atema Kanga Tongtibang Nisung (VIP) asütsü.

OLEMSABANG

AIATAI APRIL 10 ANOGO YA KODA TEJASHITSÜ KA!

~ I.Zülu Pongen, Mongsenbai Ward

Oh! Asür Bendangla, na kong lir, Alimai ne mang bushir,
Tangarbo mozükii aobaji aneper arur,
Saka nabo taneptsü bushia aoba
Tang tashi ola maka, kidangia meshilanger,
Süaka temangbo kidangisa bener arur, saka nabo
shingaia mangu, kinungeria mangu, ya koda asü.

Alimai imla, na asünübo chubar kima benjung tulu yanglua mang ayimtsü,
Nai aazüka yutsüba mapa tajung ajak
Lua arua kuli süla sung, nai inyakbatem
Anogo süi memetet kulisürtem nungtepla
Ano ne sempet yari Arogoia tesayur asütsü shim,
Yamaji tanü tashi education board nunga na longzük ka liasü.

Ya shibai yimla, mojingi tenük merem agi ne mapa tempangtsütsü,
Atong aser maochiba lijakjang agi tepset,
ne dakbo meremsepba sempet aketyong
Lanu-ainati ne shisatsü nungdaka liasü,
Kümsük nungbo tain, saka ne sempetbo
Shisaliok nung punier ka am alia aru.

Oh, nabo Mulongyimsen Missionary yimkü nungi sotetla,
Tesayur Bendangla, yimer aser arogopuri salem ashir,
Alima wara mojing tongpang nung
Nokinketer ka ama taküm sama-aka, Yisui ashi,
'Shia aruba aser taküm ni, kü dak amangerbo ajak taküm angutsü'
Hali-lu-ya tamang tongpang kokogo.

AROGO ASER LAISHIRI YAMAI CLEAN ELECTION NUNG SHILEM AGIDAKTSUNER

~ Dr. T. Jamedi Longkumer, Assistant Professor,
Dimapur Government College

(Yashi adok nungi...)

CEC Achaayangbabangdaktamendakdak:

- * Arogo Mungdang ajanga iba CEC bangdak tentetsü.
- * Iba bangdak-i political parties aser stakeholders ajak den sensaksema/consultation agia election related ground rules and regulationslatetsü aser ajak asoshi election tokteptsü atema kasa inyakyim lateta yutsütsü(create a level playing ground for all candidates and parties without any partiality or preference).
- * CEC bangdak-i political parties ajak den equi-distance maintain asütsü aser shinga anema mesüra support süa meinyaksü aser mejembitsü (The clean election campaign must not support or voice out against any party).
- * CEC bangdakji principle-grounded initiative ka asütsü -election nung tashiyim aser sen amshiba anema noktakba people's movement ka asütsü (Rejection of violence, threat, identity-politicsand inducement).
- * CECji democracyongshi 'honest and fair election' (ochi aser liromedem election) Naga lima nung meraketa akangakanga tentetdaksütsü merangba bangdak ka asütsü. Linük senso (citizen) shirnoksa election nung shilem agitsü temsüa ali (voter mesüra candidate ama) parnok ajak kecha tetsübu aser tenokdangba malipei shisa tajung amshia (through informed personal choice) shilem agitettsübaji CEC nükjidong asütsü.

Otem

Naga societyji Mizo societyama homogenous lokti ka masü;asenok telemsa onsara,anungji Naga kin ajaki ken nungdangbo Clean Election onük nung arok tangatetep (general consensus) kati aruamaparen külemi tenzüka aotsüji tasak asütsüama bilemer. Saka district level nungbo CEC maparenji takok ngua inyaktetsü lenmang lir kechiyong district teimba ka nung majority kin (ali kibur)ka dang. Tatishitsü agi, Mokokchung district nung asenok Ao kin-i CEC inyakyim agizüka inyaksü bangjema telemtetba agira aji takok ngua inyaktetsü.Aser asenok Aortemi,Ao Arogo Mungdang, Civil Societies aser nüburtemi, yamaji Mokokchung district nung inyaka sayunungbo Naga kin tangartemia jilo ajizüka asen sülen anitaksü. Anungji Clean Election Campaignji asenok Aortemi Naga nung lenmang tasen kati anir aotsümaangka (opportunity) tulu ka asen madang Tsungremi yutsü ama bilemer. Kum 150 tejaklen asen kin-i tamangba aser shisaliok lenmang tasen mesemteta tasü ita Naga kin ajak anir apusoba ama tanü asen jakdang iba kasalensisüba mapaelection wadang nung inyaksü anungdaka lir.ABAM 150th anniversary 2022 küm amongtsü aser 2023küm State Assembly election agitsü-iba electionji Mokokchung district nung Clean Election principle nung agitetra koda tesüngmangtsü aser jangratementsüka asütsü!

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Pastor temi Yirusalem nung yimjung atema sarasademtsü ayongzüker



May 10, 2021 nü Hamas kiralongrartemi Gaza Strip nungi Israel tsütsülen rocket khaloktsüba mapang tangokba noksa nung angur.

May 16, 2021: Tang Middle East nung Israel aser Palestine nung tsüingda azü tokshia raraba mapang nung Pastor tem aser Khristan lenirtemi Israel aser Hamas na tsüingda tangatettep kati arutsü aser Yirusalem nung yimjung alitsü atema sarasademjang, ta mepishia metetdaksü.

United Nations (UN)-i, tang Middle East nung rocket amshia raraba ajanga rara tuluba adoktsüa akok, ta tekümdangtsü metetdaksüogo.

Tawa Yirusalem nung aliba Temple Mount nung Israel police den raraba mapang longkak aiter noklang aika yiruba sülen Hombarnü (May 10) Islamist kiralongrar telok- Hamas-i missiles aika Yirusalem nung khaloktsüba sülen rara tamajungba kümogo.

Nüngtugu sayutsüingir, asür Billy Graham'er jabaso, sayutsüingir Franklin Graham-ia Facebook ajanga Khristantem dang Yirusalem nung yimjung atema sarasademtsüla, ta ayongzükerogo.

Franklin Graham-i, telok anaprongla nung tai maketertem aika lir, aser maneni raraba ajanga shinga tajangzük mangutsü, ta metetdaksü.

Facebook post ka ajanga Graham-i, "Israel nung alir kü

medemer aika lir, Arab nung er dang masü saka Yihuda nung medemertema aika lir, anungji iba tensa atema onoki kanga tebilemstü akar. Nisungtem tepseter, kibong aika tetsübu nung bomb nungi kümzüksü atema shelters jenoka lir, aser parnoki asen sarasadem nüngdaker. Laishiba nung asenok dang tuyuba ama asenoki 'Yirusalem nung yimjung' atema sarasademtsüdi. Tenüngsang Ken 122:6," ta mepishia metetdaksü.

Dallas, Texas nung aliba Oak Cliff Bible Fellowship nung pastor, Tony Evans-i May 12, 2021 nü twitter ajanga, "Middle East nung rara ajanga kongshirtem atema ni tebilemstü akar. Tawa ni iba region semdangogo, aser nisung tajung aika ajurua liasü. Iba rara ajanga timtem ajangshirtem atema asenok ajaki sarasademtsü ni mepishir," ta metetdaksü.

Grapevine, Texas nung aliba Fellowship Church nung pastor, Ed Young-ia Facebook ajanga tang Middle East tensa atema sarasademjang, ta mepishia metetdaksü.

"Kü den külemi sarasademdaksüner. Tai maketertem lendong nungi kümzüksü atema, yimjung atema, mangyimer atema aser

asen lenirtem atema sarasademtsüdi. Yisu tenüng nung #IsraelAtemaSarasademdi," ta pastor-i ayongzük.

NBC osang ajanga ashiba agi, Jerusalem Day anogomong nung iba benjung amonger Jewish religious observers amakba sülen Hamas kiralongrartemi Israel dak rocket 200 dak tema khaloktsüogo.

Israeli Defense Forces otongdar-i ashiba agi, rocket amshia amakba ajanga Israeli Parliament-Knesset senden thinena liasü.

Osang angazükba agi, Palestinian enclave nungi amakdang Gaza Islamic yimsüsürtem indang underground infrastructure aser military post ka raksatsüogo.

India nung Coronavirus tashidak agi Khristan putir 117 süogo

May 16, 2021: Tesüiba ita ka tsüingda India nung coronavirus tashidak agi Khristan putir 120 jungnüa süogo; tetezü ita ka tsüingda anogo shia putir pezü asür.

Arogoi achaayangba Indian Currents magazine nung yimobilem zülur, Suresh Mathew-i April 10 nungi tenzüka May 14 tashi nung coronavirus tashidak agi asür putir 117 tenüng aser parnok inyakba Arogotem tenüng metetdaksü.

May 15 nü osangbener den jembidang Mathew-i, "Tentüng tarensen ya mabensa aser iba dang nungi timba asütsü, kechiyong coronavirus tanaben prokba mapang nung iba tashidak agi asür putirtem ajakbo onoki memetet," ta ashi.

Khristan putir 117 nungjagi 48 bo denomination balala nungi lir, aser asürtem timtibaji Jesuits putirtem (19) lir.

India nung Arogo 174 nungi osang tejangja anguba sülen ang iba tashidak agi putir kwi asüar tejangja metettsü, ta pai ashi.

"Iba osang ya taoksatsüka lir, kechiyong India nung Catholic putir 30,000 shi dang lir, anungji anogo shia iba tashidak agi putir pezü asüba ya onok asoshi tebilemstü tuluka lir," ta Mathew-i ashi.

ANOGO ABEN TSÜNGREM DEN

Temenen aidoktsüba azüh

"Shibai pei meyong asoshi ne ozüing raksabatem aidoktsür aji ni lir, aser ne menentem Ni mebilemtettsü". Isala 43:25

Khen mapang class nung tesayur kati tanurtem dang yamai asüingdang: "Tsüingrem tsüingdang tamakoktsü kar lir asü? Tanur kati langzü: "Au, Yisu Khrista azüh ajanga Pai kü temenentem mangur". Tetezü tanubosangi shinübaji Yisu Khrista azühi kodang asen menen aidoktsür ibaji tanaben angutsü makok. Anüing nung mepet mengui samaba, black board nung chalk agi zülua aliba aidoker manguba mesüra süoshi nung aliba lishi mesüra ar sapon o surf amlepa shitokba ajanga la dak keta aliba tashi meshi melega itemji samatsüba medem Yisu Khrista senti azüh agi shitokba ajanga asen dak keta aliba memeshiba aser memerükba ajak nungi teti asoshi merüka kümdaktsütsü Pa dak ain tashiji kar. (I Yohan 1:9).

Khrista shibai asen taküm nung aliba temenentem aidoktsütsü asoshi Pei taküm bendanga tenla agütsü, iba tenlaba nungi koda senti azüh ayim; ibaji adangji nung shirnoki pei taküm nung agizükteta amanga benshir parnok menentemji joko mebilemtettsü.

Sarasadem

Kibuba Tsüingrem, Nai Ne ozüing raksabatem kü dak nungi meshi melega samadaktsüba asoshi kanga pelar, maneni nai yariangma. Amen



Laos nung Khristan lanur kar arem nung sarasademba noksa nung angur. Khristan yimsü metoktsüra yimdak nungi mindoktsü ta metetdaksüba sülen nungi parnoki arem nung ang tekülem sentong agir. Laos nung pastor, Sithon Thippavong küm ka shi tepuokdak liasü, aser tawa ketdangsertemi sangküm March ita tashi sayutsüngi masütsü atema pa nem nangzükdaksüba sülen chikologo.

"Madhya Pradesh kübok Jabalpur nungi putir, Gerald Almeida-i, "Putir aikati mapang shidak nung medical teyari magiteti asür. Iba tensa ya kanga majung," ta ashi.

Taküm April ita tom nungi tenzüka tanü tashi nung India linük nung anogo shia nisung 300,000 tema dak coronaviurs tashidak puteta arudar, aser hospital tem nung yipten, oxygen aser tongtibang mozütem agi anünger.

Shirangertem hospital corridors aser hospital kima moapu nung atateper aser aika hospital kima ambulance nung medical teyari ataba mapang asür.

Almeida-i, "Putir aika iba wara mapang asüba agi ni kanga aoksar, kechiyong linük nung putirtem kanga ajema lir, ta ashi.

Almeida'er Arogo nung putirtem aser nun tem atema quarantine center ka lapokogo, aser iba centre nungji covid agi shirangertem yarir.

Tang iba centre nungji putir 14 aser nun 26 treatment tagidak aser nurse pezüi parnok yariba den külemi doctor kati anogo shia iba centre semdang.

Putir aser nun tem dang shirangra idangyongjisa osang

agüjang, ta metetdaksüogo aser coronavirus tashidak putetertemji quarantine center jagi anir oa yarir.

"Kanga mejungi shirangertem ang specialized hospital-i anir aoer. Tangartemjibo shirang manep tashi centre nungji yarir," ta Almeida-isa metetdaksü.

Temeshi hopta (passion week) mapang nung putir aikati kibongtem semdangba den pastoral sentongtem agia liasü. Yaküm pastor ka coronavirus tashidak agi asüba sülen Almeida-i quarantine center ya lapok.

Coronavirus tashidak agi shirang tenzüka sülen treatment mapang shidak nung magiba agi nisung jenti asür, ta pai ashi.

"Tang ama wara majungba mapang putir aikati teyari mebushiba agi süogo. Küm aika Pastoral training agiaka nisungtem majurutsü atema parnok nem metetdakja liasü. Iba ya putirtem atema taoksatsü osang ka lir," ta pai ashi.

May 14 nü India nung nisung 326,000 dak coronavirus putetba aser iba tashidak agi nisung 3,980 asüba sülen World Health Organization-i tang India nung Covid tensa ya tebilemstü onük tuluka lir, ta metetdaksüogo.

OLONG PAITEP # 5814

1		2			3		4			5
				6		7				
8										
						9				
			10							
11										12
					13			14		
15										
16								17		

TIPILEN		LANGTSÜNGLEN	
1. Nüji masü	- (4)	1. Jila tulu	- (5)
3. Techinütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anügdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

OLONG PAITEP # 5813 TELANGZÜBA

TIPILEN :		LANGTSÜNGLEN :	
1. Tesangra, 5. Mungo, 7. Kisen,		1. Temesen, 2. Raksa, 3. Aon, 4. Aso,	
8. Salem, 12. Semki, 14. Kilem,		6. Nile, 9. Alizüng, 10. Omen,	
15. Kensü, 16. Sangpang.		11. Lemta, 13. Ola, 14. Kin.	

ALOKBA DAK AKETBA JAKLA-YIMYA KAR :

- Alokba-i inyaknuba mapa kecha maka...saka chiyungtsübo tajung dang chinur.
- Tangar nembo kecha magütsünur...saka tangar dang nungibo kechisarena yimlar.
- Lokti ajunga nung amuoshia kibur sunur...saka lokti mapabo jeta bener mooteter.
- Pa kodang lokti nung tekolak shilem agi atadir tular-tilar...takar-sensaker kanga bendanger (Partiality)... shim-shira ajak nung kin-kidong bendanga shimer (Ism).
- Mangai teshinem alidak linuba amai...lokti nung teti meputeptsü...arishiteptsü... tsükchiteptsüba...ibala sentongji tang atonga o tanang jembia mazüngi jajar.
- Village/Colony/Sector nung loktiliba ajungaji pa kapu nung ayutsü meranger.
- Arogo nunga dena teka amuoka arogo nung tenzüker ajunga pa kapu nung yur attsüshitsü/anishitsü meranger.
- Lokti ajunga nung ochi mashi teka dalang mapa inyaker/yangko semer awazür.
- Lokti nung ken o telemtetba agiba ajunga nung pai mulungba dang agidi ta asür.
- Tema tereprangtsü-bo San Chanu amai...Saka telunglen-bo Tsünu amai tesashi. Ano aika dang lir...saka yangji anena atadi....

Lilir : L.Kika Pongener.

TANÜBO NAI LANGZÜANG

Q. South Sudan indang yimti ji koba?
 A.Juba B.Yei C.Bor D.Renk

_____ (Taruba adok nung onoki langzüksü)

YASHI ADOK TELANGZÜBA : CBSE

AO OSHI ANGAZÜKDAK:

TANÜ ANGAZÜKTSÜBA OJANG



Ita

(n) aonung anüng nung adokba tesangwatem rongnungTir Yimyim tuluba (moon)

* Aonung **ita** temenungratsüka adoker.

Itta

(adj/verb) taret aser tesashi koktettsüsa tashi aliba / sünga aliba (strong / contain)

Tashidak wara agi matongtsü atema asen temang tashi **itita** alitsüla.

Onok tzüpu nung tzü **itita** liasü.

NAI-A YA METETTER MA?

MAY 17 NÜ ASOR TONGTIBANG NISUNG KAR:

- English physician Edward Jenner, (smallpox vaccine yanglusang) (1749)
- Schuyler Wheeler (electric fan yanglusang) (1860)
- Baseball Hall of Fame member James "Cool Papa" Bell (1903)
- Actor Maureen O'Sullivan (1911)
- Actor Dennis Hopper (1936)
- Musician Taj Mahal (1942)
- Actor/director Bill Paxton (1955)
- Actor/comedian Bob Saget (1956)
- Boxer Sugar Ray Leonard (1956)
- Sports broadcaster Jim Nantz (1959)
- Irish New Age singer Enya (Eithne Pádraigín Ní Bhraonáin) (1961)
- Scottish comedian Craig Ferguson (1962)
- Singer-songwriter Trent Reznor (1965)
- Actor Hill Harper (1966)
- Singer Jordan Knight (1970)
- Actor Sasha Alexander (1973)
- Singer/TV personality Kandi Burruss (1976)
- Dancer Derek Hough (1985)
- Actor Nikki Reed (1988)
- Actor/model Karrueche Tran (1988)
- Canadian Olympic gold medal ice dancer Tessa Virtue (1989)
- Actor Ross Butler (1990)
- Indian singer Pankaj Udhas (1951)
- Indian actress Nushrat Bharucha (1985)

SUDOKU # 5857

TELANGZÜBA # 5856

	4			1	5		6		2	4	3	8	1	5	7	9	6
	6				3	5		7	5	8	6	7	4	9	2	3	1
	5	9	2		6	4	8		1	7	9	2	6	3	5	4	8
6			5	4					9	2	4	6	5	8	1	7	3
4	9	3			8		5		6	5	7	4	3	1	8	2	9
	1			3	7		4	9	3	1	8	9	2	7	6	5	4
1			3						7	6	1	5	9	4	3	8	2
8	3	5	7	6	1	9		4	4	3	5	1	8	2	9	6	7
				4	2		1		8	9	2	3	7	6	4	1	5

OJANG LUTEP # 5400

- NUTARI :
- TAYUESR :
- NGINU :
- YAYIM :
- JUNTAG :
- GAZÜMANKI :
- ABURTSÜRI :
- BASAYU :
- NGNU :
- IDAANK :


OJANG LUTEP TELANGZÜBA # 5399

**TIMTEM KHURET ASER TATIDANG BALALA ARUDANG
 TEMBAR AMA AKANGAKANGA LITETER**

TAN HOPTA ATEMA - KOMA SÜLA ?

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?

Cyclone Tauktae ajanga Karnataka nung district 6 kongshi; nisung 4 asü



May 16, 2021 nü Ato kilonser, Narendra Modi-i video conferencing ajanga Cyclone 'Tauktae' atema terenemshiba asadanga senden amendang tangokba noksa nung angur.

Bengaluru, May 16 (Agencies): Amongnü Arabian Sea nung Cyclone Tauktae ano tesashiba akümba ajanga Karnataka nung district trok kübok yimtsüing 73 kongshi aser nisung pezü süogo, ta Karnataka State Disaster Management Authority (KSDMA)-i metetdaksü.

Iba yipru ajanga Karkataka nung tziyinkümlen aliba district asem aser Malnad region nung district asem nung tziunglu kanga sashia aruogo.

Karnataka Chief Minister, BS Yediyurappa-i iba tensa asadanga atadar aser kümzükba maparen den relief mapa inyaksü atema pai district in-

charges aser minister tem den tongtepratepdar.

Chief Minister-i twitter ajanga, "Onoki tziyinkümlen aliba tesemtem nung cyclone tensa mita atadar aser kümzükba maparen inyakba den külemi relief agütsüsü atema ni district in-charges, minister tem aser DCs den tongtepratepdar," ta metetdaksü.

KSDMA-i sangdong ka ajanga, "Cyclone Tauktae ajanga tesüiba ghonda 24 tsüingda district trok nung tziunglu sashia aruogo. Tziunglu den külemi mopung ghonda ka nung kilometer 70 nungi 80 tashi kera aoner, aser khenkhenbo ghonda nung kilometer 90 tashi

kera aoner. Tang tashi nung nisung pezü süogo aser yim 73 kongshio," ta metetdaksü.

Tziyim nung tziüsem tulu aliba ajanga tziyinkümlen ali kanga ponger ogo aser lenmang aika raksatsüogo, ta mezüing bushisüingda ajanga jangja.

Mopung tesashi aonba ajanga süngdong aser electric indong aika lao, ta State Disaster Management Authority-isa metetdaksü.

Iba cyclone dak sendakba nung Union Home Minister, Amit Shah-ia Gujarat, Maharashtra aser Daman & Diu and Dadra Nagar Haveli Administrator den senden mena tensa asadangogo.

PM Modi aitsürtem apuba anema Congress lenirtemi ola adoker

New Delhi, May 16 (Agencies): Delhi nung Ato kilonser, Narendra Modi aitsüba posters amaba atema police-i nisung kar apuba atema Amongnü Congress lenirtemi police aitsüba den külemi Centre sorkar dang onok-a puang, ta metetdaksü.

Congress party-i, nüburtem nem vaccine, mozü aser oxygen magütsüra Ato kilonser dang tasüingdangba tasak aika asüingdangtsü, ta ashi.

Rahul Gandhi leniba nung Congress lenirtemi Twitter nung parnok profile noksa melenshia 'Kechiba bendangleni coronavirus vaccine yok' ta asüingdang.

Twitter ajanga Rahul Gandhi-i "Ni-a puang," ta ashiba den külemi 'Modi ji, kechiba nai asen chirnurtem indang vaccine bendangleni yok' ta asüingdangba poster lemsatsep.

India-i coronavirus vaccine crore aika bendang linüktem nem agütsüba atema Delhi nung Ato kilonser aitsüba poster aika amaba sülen Delhi police-i nisung kar puogo.

Delhi Police-isa parnok

anema FIR kar benok.

Congress lenir, Jairam Ramesh-ia Ato kilonser, Modi aser Union Home Minister, Amit Shah na dang, ni-a item poster ozü kima jara nung amatsü, anungji ni-a puang, ta metetdaksü.

"Tangbo Ato kilonser aitsüba posters amabajia ozüing alema inyakba mapa asü? Tangbo India ya Modi Penal Code kübok asü? Tang ama wara mapang ka nung Delhi Police teinyaksü mapa kecha mali asü?" ta Ramesh-i asüingdang.

"Asüing ni ozü kima jara nung poster amatsü. Arur ni puang," ta Ramesh-i ashi.

Osangbenertem senden ka nung Congress otongdar, Pawan Khera-i, coronavirus anema raratsü atema nüburtemi vaccine, mozü aser oxygen mengura Ato kilonser dang tasüingdangba tasak aika asüingdangtsü, ta metetdaksü.

Khera-i, "Ni puang ta ni jazüker. Kü meyong vaccine kong lir, kü meyong oxygen kong lir? Onoki maneni t a s ü n g d a n g b a t e m asüingdangtsü," ta metetdaksü.

July tashi nung vaccine crore 51 angutsü: Centre

New Delhi, Monupii/May 16 (Agencies): India kübok states aser Union Territories (UTs) aika nung coronavirus vaccine agi anüingba mapang nung Union Health Minister, Harsh Vardhan-i, Uttar Pradesh, Gujarat, Madhya Pradesh aser Andhra Pradesh state tem nung vaccine akokba tashi timba yangludar, aser taküm July ita tatembanglen tashi nungbo vaccine crore 51 angutsü, ta metetdaksü.

Health Minister-i, "Taküm July ita tatemlen tashi nungbo asenoki vaccine dose crore 51.6 angutsü aser iba nungji agütsür aliba dose crore 18 densema lir. Sputnik vaccine-a amshitsü atema temelaba agütsüogo. Iba denji külemi temelaba angutsü aliba Zydus Cadila indang vaccine, Serum Institute of India

indang Novavax vaccine, Bharat Biotech indang nasal vaccine aser Moderna mRNA vaccines-a densemabo August-December tashi nung dose crore 216 angutsü," ta metetdaksü.

Gujarat nung coronavirus tashidak kanga putetba dak sendakba nung pai, Ahmedabad, Vadodara aser Mehsana nungbo ICU yipten ajak süngogo, Ahmedabad nung oxygen yipten shilem 97 aser Vadodara nung oxygen yipten shilem 96 süngogo, ta metetdaksü.

April ita nungi tenzuka Andhra Pradesh nung hopta shia coronavirus rates shilem 30.3 ainer, talisa Chittoor, East Godavari, Guntur, Srikakulam aser Visakhapatnam nung iba tashidak kanga puteter, ta paisa metetdaksü.

Uttar Pradesh nung hopta trok tsüingda iba tashidak kanga puteter, talisa Lucknow aser Meerut na nung teshirangdakpur 14,000 dak tema lir, ta pai metetdaksü.

Madhya Pradesh kübok district 10 nung iba tashidak kanga puteter aser tang state nung teshirangdakpur lakh 1 dak tema lir. State nung Indore, Bhopal, Gwalior aser Jabalpur district tem tamajungba, ta Minister-i ashi.

Tang tashi nung India nung ayoktsü atema vaccines asem (Covaxin, Coveshield aser Sputnik V) dang temelaba agüja lir. India nung Russia nung vaccine Sputnik V amshitsü atema temelaba agütsüogo, ajisüaaka iba vaccine ya tangbo linük tesem kar nung dang angur.



May 16, 2021 nü Chennai nung Nehru Stadium kima Remdesivir mozü alitsü atema nisungtem atatepba noksa nung angur. Antiviral mozü Remdesivir ya coronavirus agi shirangertem treatment atema amshir.

India nung ano nisung lakh 3.11 dak Covid putet aser 4,077 asü

New Delhi, May 16 (Agencies): India linük nung ano nisung lakh 3.11 dak coronavirus putetogo; tesüiba anogo 25 den medemdangra tang nisung ishiba dak iba tashidak puteter; tesüiba ghonda 24 tsüingda nungsa linük nung iba tashidak agi shiranger 4,000 dak tema süogo, ta Amongnü Union health ministry data ajanga metetdaksü.

Tesüiba anogo ka tsüingda nisung 3,11,170 dak coronavirus putetogo, aser ibaji densemabo tang tashi nung linük nung nisung ajak agi 2,46,84,077 dak iba tashidak puteter, ta Amongnü anepdang 8:00 ako nung Health Ministry-i metetdaksü.

Tesüiba ghonda 24 nungsa India nung coronavirus agi shiranger 4,077 süogo aser linük nung iba tashidak agi asür ajak agibo 2,70,284 jungogo.

Tang linük nung coronavirus agi teshirangdakpur 36,18,458 lir aser ibaji coronavirus caselaod

nungi shilem 14.66 lir; tang tashi nung linük nung iba tashidak agi shiranger shilem 84.25 (nisung 2,07,95,335) anepogo aser shiranger asüba shilembo 1.09 dang lir, ta Health Ministry data ajangasa metetdaksü.

Amongnü ICMR-i ashiba agi, May 15 tashi nung samples ajak agi 31,48,50,143 tendangogo aser iba nungji Honibarnü samples 18,32,950 tendangba densema lir.

Yaküm India nung August 7 nü coronavirus case lakh 20 junga liasü, August 23 nü lakh 30, September 5 nü lakh 40 aser September 16 nü lakh 50 ajung.

September 28 nü coronavirus case lakh 60 ajung, October 11 nü lakh 70, October 29 nü lakh 80, November 20 nü lakh 90 aser December 19 nü crore 1 junga liasü.

Taküm May 4 nü India nung coronavirus case crore 2 ajungba sülen-a coronavirus case lakh 46 bendenlokogo.



Prayagraj (Uttar Pradesh), May 16, 2021: Prayagraj nung Ganga ayong tziüküm anasa coronavirus tashidak agi asürtem tasüing lisem nung rema aliba noksa nung angur.

Israel-i Gaza yimti nung ano nisung 23 tepset



Gaza City nung Israel-i tayimtsü amshia amakba mapang nisung aliba ki raksatsür alidak Palestine nungertemi par nisung takum ali mali repringba mapang tangokba noksa ka yangi angur. Deobarnü Israel nungeri tayimtsü amshia amakdang nisung aliba ki tulu asem lao aser nisung 23 asü, ta osangtem ajanga ashir.

Gaza City, Monupii/May 16 (Agencies): Gaza Health Ministry-i sangdong ka ajanga, Israel nungertemi tayimtsü amshi Gaza yimti amakba sülen nisung 23 süogo aser 50 yirur lir, ta metetdaksü.

Kasa mapang nung Israel-i ashiba agi, parnoki Gaza nung Hamas lenir tongtibaer kidang bomb pokloktsüogo. Taoba anogo ana tsüngda tang agi asembenbuba Hamas lenirtem ki makogo.

Israel-i hopta ka shi tayimtsü amshia Gaza amakba sülen Israeli military-i Deobarnü, parnoki Gaza nung Hamas lenir tongtibaer ki raksatsüba metetdaksüogo. Kasa mapang nung Palestine nunger telungpurtemia Israel dak rocket aika khaloktsüogo.

Hamas pur takok tashi tashi meitei kümdakja ceasefire ka benoktsü atema nongshitsü asoshi Israel-i anogo ishika Gaza kanga sashia maka arudar. Tensa azüoktsü merangtsü atema U.S. diplomat ka iba tesem nung oa lir aser U.N. Security Council-a Deobarnü ajurutepogo.

Military-i ashiba agi, parnoki Gaza nung Hamas lenir tejentiba Yehiyeh Sinwar aser pa adianu Muhammad'er ki amak. Honibarnü parnoki Hamas indang political branch lenir Khalil al-Hayeh'er ki raksatsü.

Brig. Gen. Hidai Zilberman-i, Gaza anüolentip kübok Khan Younis jila nung amenoker aliba Sinwar'er ki raksatsüba jangjatsüogo. Army otongdar-i ashiba agi, Sinwar adianu, shiba Hamas indang "logistics aser

personnel," incharge lir, par kia raksatsüogo.

Hamas indang tongti lenirtem Gaza nung atsükatokogo aser parnok ki amakba mapang parnok pei kidang alitsü mimlar. Hamas indang tongti lenirsa, Ismail Haniyeh Turkey aser Qatar na nung melentepa alir, shirnoki parnok telok nem yimden yimsüsüba tsütsü teyari agütsür.

Hombarnü rara tenzükba sülen rarar 20 asüba osang Hamas aser Islamic Jihad militant teloktemi jangjatsüogo, ajisüaka Israel-i ashiba agi asürtem iba dang nungi timba asütsü.

Tang iba rara nung Gaza nung Palestine nunger 145 süogo, kong tanur 41 aser tetsür 23 densema lir. Israel tsütsülena arishi küm 5 tain tanur ka aser sepai ka densema nisung ti süogo.

Hombarnü nungi tenzükba Hamas aser tanga telungpurtemi Israel dak rocket 2,900 shi khaloktsüogo. Jerusalem kübok temeshi tesem ka nung mangatettep adokba den Palestine nunger kibongtem mintoktsü asoshi amokmerenba ajanga tensa tamajungba küma iba rara tenzük.

Israeli military-isa, rocket-tem tesa dangbo tom nung tsük mesera khadangogo, ajisüaka rocket tem aika yimti tongtibattem tongogo aser iba ajanga nüburttem mesüngjemeti kümogo, ta ashir.

Israel-i tayimtsü amshia Gaza noklang aikaben makogo, kong Palestine nunger million 2 dak tema alir.

Israel-i Associated Press indang Gaza office densema Gaza nung ki atongtepa sür alibatem aika raksatsüogo.

Deobar anepdang Israel nunger indang raradang amshiba tayimtsütemi central Gaza City nung ki aser lenmang aika poksatsüogo. Osangbenertemi lemsatepba noksa nung Shifa mozüki-i aoba lenmang tongtbai ka tapok tuluka adoka poksatsür aliba nguogo.

Health Ministry-i ashiba agi, Deobarnü Gaza amakba sülen nisung ana asü aser tetsür o tanur densema nisung 25 yiruogo.

Mangatettep tenzükba sülen Israel-i Gaza yimti nung office aser ki aiben atongtepa tua sür alibatem raksatsüogo aser ashiba agi, item kitem nung Hamas indang military infrastructure tem amenoka lir. Honibarnü parnoki 12-story al-Jalaa Building poksatsüogo, kong AP, TV network Al-Jazeera aser tanga media outlets tem idang office tem den nisungtem talidak apartment aika amenoka liasü.

"Nüngdak ta bilemba mapang ka tashi iba inyakim ya maneni aotsü," ta Israel Ato Kilonser Minister Benjamin Netanyahu-i Honibarnü ashir. Pai, Hamas military intelligence iba ki nung amenoker inyaksangshia liasü, ta ashir.

Iba ki mamak tsüngda Israel military-i ki kibur dangi call süa ghonda ka tsüngda ki amaktsü ta osang agütsü. AP indang staff tem aser iba ki nung alirtem kicha timtem melei iba ki toktsür ajen. Iba sülen missile asem iba kidang pokloktsü aser ajasa yok.

Manila mozüki arongba ghonda pongu sülen remseptet

Manila, Monupii/May 16

(Agencies): Philippines nung mozüki tulu ka nung kitsük-kirong lendong atalokba remseptetogo, kong coronavirus agi shirangertem anepalua liasü.

Linük yimtiba, Manila nung sorkar meyong Philippines General Hospital nung Deobarnü mi jangrudak asü-amaba osang mali. Yangji mi jangru tenzükter ghonda pongu lir anepbongi remseptet.

Tang tashi iba mi jangrutetba kuli monguteti lir aser mozüki ketdangsürtem den osang magitepteter.

University of Philippines' College of Medicine nungi professor Dr Jay Germer-i, mozüki nung inyaker aser shiranger ajunga kumzüka lir, ta ashir.

"Tang tebilemstüji ward tem nung mokozü aliba ya lir," ta lai ashir.

Vice President Leni Roberdo-i Twitter nung mokozü ayipdoktsü atema industry nung amshiba fan tulu asüngdanga

liasü.

Shiranger kar anasa aliba mozüki temi anir ao, aser item rongnung surgery agitsü nisung ana aser neonatal intensive care unit nungi kinü tanur 12 dena liasü, ta mozüki ketdangsürtemi ashir.

COVID-19 agi menepa aliba shirangertembo mozüki indang ward balaka nung intensive care unit aser emergency room nung aniok, ta osang ka ajanga ashir.

"Parnok yangji aniden aser COVID agi meshiranger den memeyoktepdaksü," mozüki indang odongtar Dr Jonas del Rosario-i ashir.

Mi ya ayatirm sülen operating room supply area nungi tenzük, ta yangji inyaker kati ashir.

Iba mozüki nung yipden 1,300 dak tema lir aser küm nung shiranger 600,000 dak tema anepalua.

Philippines nung nisung million 1.1 dak tema COVID-19 agi menepogo aser nisung 19,000 dak tema süogo.

Afghanistan nung asemnü ceasefire tembangogo

Kabul, Monupii/May 16

(Agencies): Afghanistan sorkar aser Taliban tsüngta asemnü ceasefire aliba Deobarnü tembangogo aser aikati yimjung ken o tanaben jembishitsü akhanger.

Linük south tsütsü Helmand province indang yimtiba, Lashkar Gah nung Deobarnü rara tenzükshi, ta Afghan mitkar indang odongtar aser yangji alir ketdangser kati ashir.

"Tanep rara tenzük aser tang tashi rarar," ta Helmand provincial council tekolakba, Attaullah Afghan-i osangbener dang ashir.

Taliban teloki Lashkar Gah tezülen aser tanga district tem nung alliba security checkpoint amak, ta pai ashir.

South nung Afghan army odongtar kati rara tanaben tenzükba indang jangja shiogo.

US-i anir 2001 küm yimsüsüba menden nungi atsüngdokba sülen sorkar anema nok-o-nü bener nokdaka arur, Taliban ajanga rara tenzükba atema anüolen linüki busemba Kabul administration tenüng asener.

"Parnoki (Afghan sepai) operation tenzük... onok tenüng tesen," ta Taliban odongtar Zabihullah Mujahid-i osangbener dang ashir.

2020 küm February ita US den yimjung tezüngzüktep ka nung sign sütepaka iba telok yagi Afghan sepai dak maneni amaker. Parnoki Kabul ya

anüolen linüktemi anishiba yimli ka lir, ta ashir.

Anogo ka tejakdang sorkar aser Taliban telok nungi yimjung ken o jembirtem Qatar nung khen ajurutep, ta Taliban political spokesman Suhail Shaheen-i ashir.

Honibarnü parnoki rara tatem kati arudaktsütsü asoshi yimjung lenmang maneni bushitsü pangjem aser anendaka aliba jembishinü tekeraba nung tenzüktsü akhang, ta pai ashir.

Iba linük nung teti asoshi yimjung bener arutsü atema US-i inyaksüba nung shilem ka ama Kabul aser Taliban tsüngta Qatar yimtiba, Doha nung taoba küm September ita nungi jembishinü arur.

US-i Afghan nung tentet balala dang tekeratiba nung jembishinü tenzüktsü ajungshir, kechiaser Washington-i Afghanistan nunger par sepai anünga aliba 2,500 nungi 3,500 shi aser NATO sepai anünga aliba 7,000 anizükter ao tenzükogo.

Muslim nunger Eid al-Fitr benjong amungtsü atema Taliban aser sorkar tsüngta ceasefire zülutepaka Afghanistan nung azüdokshi maneni liasü.

Hokulbarnü Kabul north tsütsü mosque ka nung bomb tesashi ka poka tekülemer nisung 12 asü aser nisung 15 yirua liasü. Iba lendong ya Taliban-i meinyak ta sangdong aser ISIL temi tenüng agi.

KIBONG KUMER KÜM 50 AJUNGER

Wb. Sentisangba Jamir (Longjemdang) & Wt. Imnasuchala Kupzar



Temeim tulu aketba ozü tsürabur tajung ana kibong kümer tanü küm 50 ajungba anogo amongtsü moatsüba asoshi onoki Tsüngrem tenüng asanger. Nenati nena taküm bendanga agüja onok meimba aser sarasadema anepaluba mapatem ajak asoshi nena dang onok ajaki kanga pelar. Tulusang Tsüngremi ano maneni nenaprongla nem taküm tajung, tepela aser arishi talang moajangma ta onoki sarasademtsür.

- Temeim Chirnur, anük-apang aser semchirtem.

2021 Billboard Music Awards nung Duran Duran-i shilem agitsü



Monupii/May 16, 2021 (Agencies): Blur indang Graham Coxon den Duran Duran longjemer aruya aliba 2021 Billboard Music Awards sentong nung shilem agitsü terenemba lir.

Simon Le Bon aser par telok den Britain indang pop kentener mongin Graham longjemer ken tasen ka yangluogo, koba parnok indang taruba kensep nung angutsü aser May 23, 2021 nü agitsü aliba sentong nung iba ken atentsü imlar.

'Wild Boys' kentener telok Duran Duran indang ken ya UK nung tangoktsü aser iba sentong nung sayutsü. 2021 Billboard Music Awards sentong ya Los Angeles' Microsoft Theater nung agitsü.

2015 indang 'Paper Gods' kensep tatongtep atema Duran Duran-i mazüngi inyaka arudar.

Simon-i ashiba agi, taoba küm tajangzük kaji, alima ajunga Covid-19 wara agi timtemba mapang tour sentong tem magi aser aji anisüngzük ama liasü. Küm ka tashi sentong kecha nunga shilem magii aruogo aser taküm onoki ken tasen kar atentsü akok.

"Ken tasentem ya yimya balaka nung mejema yangluogo aser taoba kensep dang nungi balaka alitsü," ta pai ashi.

"Producer, Erol Alkan-i onok

dang kentener ka ama ayong ayonga melii ken tasentem yimya balala nung mejema atentsü asoshi mapang shia ajungshia aruogo. Music ji, iba yimya nung dang masü saka tangar atema tatishitsü asütsüsa aser ken ajanga parnok atsüa arutsüsa yanglutsüla ta ashi," ta Simon-i lemsatep.

Duran Duran pur indang BST Hyde Park sentong 2022 tashi atsülangtsüba sülen, Simon-i iba olen lemsatepa liasü.

Taküm indang Billboard Music Awards sentong nung Pink, The Weeknd aser BTS nungeri sabang nung shilem agiba angutsü.

Nüngtugu kentener aser actor Nick Jonas-i iba sentong ketdang (host) asütsü. Iba Award sentong nung 'The Weeknd'-i nomination 16 ngua lir. Iba sülen nomination timtuba angur temji DaBaby - 11, Pop Smoke - 10 aser Gabby Barrett - 9 nunger alitsü.

Iba sentong nung nomination - shortlisted artists aser winner atema, March 21, 2020 nungi April 3, 2021 tashi fans den music ajanga jembiba, album aser digital song sales, streaming, radio airplay aser loktii parnok jangjaa akümba, Billboard nung parnok ken züngokba tem nungi asadanga liasü.

Tongtibang osang kar Twitter sabang ajanga lemsatepa liasü.

Lai iba sabang nung noksa asem den külemi Delhi nung nüngdakba osettem timba agütsüba aser Khalsa Aid teyari ajanga Punjab nung shirangertem nem medical supply talila yokogo, ta lemsatep.

Tang ama tensa tamajungdang, donor aser teyariteper tem COVID agi shiranger kibong/adianu tem den tongteprateptsü asoshi social media yagi shilem tuluka agidar. Nübur timtemba

Motley Crue indang tour sentong atsülangger



Monupii/May 16, 2021

(Agencies): Poison, Joan Jett aser Def Leppard den longjemer agitsü aliba Motley Crue indang stadium tour sentong ya renemba anogo nung masü saka 2022 küm ang agitsü asoshi anogo atsülangtsüogo.

Taoba küm tsüklawa mongpu mapang, nüngtugu band pezü yagi Stadium show sentong ka tenzüksü renemer liasü, saka alima ajunga asüngba Covid-19 wara ajanga 2021 atsülanga liasü.

Ajisüaka, iba concert ano küm tashi atsülangba (2022) ajanga fans tem tezü atanger.

"Iba tour renemba ama masü 2022 küm ang agitetsü ta onoki osang angazükba nenok ajak (fans) den lemsateper. Yamaji asünungang, sentong agitsü renemba anogo ajak nung ticket alia alir ajaki arua reprangtetsü. Nenoki angateta

aser arema ataba atema pelar aser iba Stadium Tour nung nenok ajak den ajuruteptsü asoshi yongya atar. Iba tour takok ngua agitetra otsü asütsü," ta Instagram sabang ajanga parnok lemsatep.

Taoba küm, Jett-ia, "tang ama tensa tamajungdang, kü den külemi ken atentsü pur - Blackhearts-i shilem agitsü memulungtsü, ta shia lir.

"Tangba mapang, Band mesüra crew tem anir tour sentong nung senzütsü ya jangratemtsü kabo masütsü. Parnok taküm nung ni tebang ayitsü mesüra kü mulungka nung anir inyaksü kü dak kecha temeden mali," ta lai ashi.

2015 küm 'Girls, Girls, Girls' puri parnok indang 'Final Tour' sülen tanaben longjemshitsü sentong jangjatsüba sülen, 'Stadium Tour' nung Motley Crue-i tanaben shilem agir alitsü.

Actor Chandran alima nungi pilaogo

Mumbai, Monupii/May 16, 2021 (Agencies): Actor tejen, KD Chandran, shibai Juhi Chawla aser Aamir Khan na indang 'Hum Hain Rahi Pyar Ke' film nung shilem agi, Deobar anepdang pa iba akümüli nungi pilaogo.

Iba film - Hum Hain Rahi Pyar Ke nung Chandran-i Juhi indang tebu shilem agir. Chandran temang nung timtem aliba ajanga Mumbai kübok Criti Care Hospital-i anir ao aser temulungjang agi mapa meinyaki akümba sülen pa süadok.

Chandran'er jala aser actor-dancer Sudha Chandran-i Aaj Tak den sensaksema mapang tebu asüba osang jangjatsü aser lai ashiba agi tebu manemi liasü.

Tan ita tetenzüklen, Sudha-i

tebu asoba anogomung bilemteta munga liasü. Instagram sabang ajanga, "Happy birthday Appa.....nai tatishitsü tajung sayua taküm asüngteta litetba atema pelar aser nü tsüngsü nung jajaba ajanga tanü ni iba jenjang nung lir. Nü mapa tajung asoshi nümatanga bilemer. Ravi künaprongla na asoba anogomung nung salem abener. Appa onoki na meimer," ta lemsatep.

Acting tsütsü, KD Charan-i film talisa Hum Hain Rahi Pyar Ke, Tere Mere Sapne, Jab Pyaar Kisise Hota Hai, China Gate, Pukar, Har Dil Jo Pyar Karega, Shararat, Koi Mil Gaya aser TV series Gulmohar nung tongti shilem agiba ajaki jangjaa lir.

Twinkle Khanna-i 'oxygen concentrator' tem lema agütsü

Mumbai, Monupii/May 16, 2021 (Agencies): India nung Covid-19 wara anema raraba mapatong pusemstü nükjidong nung, tesüiba anogo ishika tejakdang Twinkle Khanna-i la kinungbo Akshay Kumar tenati oxygen concentrator 100 tenlatsü asoshi osang sangoktsüogo.

Nangzükba ama, lai maneni senotsü lenmang bushia aser timtema alir/nüngdakba pur tem nem teyari agüja arudar.

Deobarnü, Twinkle-i lai tenzükba maparen nungi

angadanga teyari agütsütsü, helpline number lemsateptsü aser relief teyari agütsütsü atema tongtibang nübu aikati lenmang balala ajanga nungita arudar. Ano külen, Twinkle mapatong nung entertainment sabang nungi celebrity aikati denogo. Tangba mapang mozüki nung nüngdakba oset - oxygen concentrator' tem agütsütsü asoshi lai meranga inyakdaki.

Taoba ita Akshay Kumar dak Covid-19 positive puteta liasü. Tekümdangtsü mera

agitsü asoshi Akshay-i pa sasa mozüki ka nung amungtsü lemtet. Iba sülen hopta ka lir Akshay kidangi tanaben shilangba Twinkle-i osang jangjatsü.

Taoba küm nungi, timtemer tem yaritsü asoshi Akshay aser Twinkle napronglai maparen balala inyaka arudar. Tentet balala nem senotsü teyari agütsüba dak alaka, apuani yagi police, hospital staff, frontline workers aser film industry nung anogoshia ayangertem lenmang balala ajanga yariogo.

Leicester City-i tang mezüngbuba FA Cup kokogo



Monupii/May 16, 2021 (Agencies): Honibarnü Wembley nung Chelsea den FA Cup final asaya nung Youri Tielemans-i Leicester City atema goal ka idaktsüba ajanga parnoki goal 1-0 agi iba asayamung kokogo.

Final asaya nung fan 21,000 arua denogo, koba taoba kumbo coronavirus tashidak pokteter aliba ajanga kishi shibanger asayaa liasü. Final asaya akokba sülen Thai nunger Leicester kibur asayatem den benjungteptsü atema jaoka liasü.

A i y a w a t t Srivaddhanaprabha tebu Vichai, shibai club alizükba ajanga Leicester jenjang yanglutsü, pa 2018 kum Leicester indang stadium kima helicopter tsükokba lendong ka nung asü.

"Onok tola telunglen pa indang noksa ka lir anungji pa onok den teti alir. Onoki iba anogo atema mapang talangka jembia aruogo," ta Leicester keeper Kasper Schmeichel-i ashi.

Leicester pur taoba FA Cup final pezüprongla nung tamakok angu aser tatema parnok 1969 kum iba asyamung final nung asayaa liasü. Final nung indaktsüba goal ya asayamung tenzüker kum 149 puti otsü nung goal tajungtiba ka ama teti bilemtetsü.

Asaya tatemi minute 89buba nung Wes Morgan-i par goal nung ball idaktsüba sülen Chelsea pur asoshi anisüngzük angu ajisüaka VAR ajanga offside asüba poteta goal magi akum.

Thomas Tuchel-i aniba Chelsea team-i asaya mezüngbuba shilem amokbanger asaya ajisüaka goal idaktsüba asoshi maongka mongutet. Leicester indang centre half Jonny Evans, minute 34buba nung yrur tuguadokba sülena parnoki iba maongka magitet.

Tielemans-i final nung idaktsüba goal ya asayamung puti otsü nung goal tajungtiba ka ta züngshitsü. Ball agizükba

sülen Tielemans-i ball tejakdangi bener alu aser Chelsea defence tesüleni atsüngzükba luya aliba mapang pai talang nungi ball metsüloktsü; Chelsea keeper Kepe Arrizabalaga-i ball nokdangtsü merangdang saka ball menokdangteti idaktsü.

Iba sülen team ana tsügdanga toktepa asaya aser Chelsea asoshi goal idaktsüba atema maongka dena ngutetogo, ajisüaka keeper Schmeichel-i ball kanga junga nokdanga par team takok dangi ani.

Leicester manager Brendan Rodgers atema iba ya English football nung mezüngbuba takok marok liasü, shiba Scotland nung Celtic den kanga takok ngua inyaker iba club-i aru.

Kasa mapang nung Tuchel asoshia takok marok angutsü maongka lir, kechiyong Chelsea pur Champions League final nung Manchester City den asayatsü lir. Final asaya ya Porto nung May 29 nü asayatsü.

UEFA Champions League Final Portugal nung asayatsü

New Delhi, Monupii/May 16, 2021 (Agencies): Manchester City aser Chelsea na tsüngda May 29, 2021 (Honibar) asayatsü aliba Champions League final ya Istanbul nungi Portugal-i belenerogo, ta UEFA sangdong ka ajanga metetdaktüsü.

UK indang 'green travel' list nung Portugal dena lir asünung, Estádio do Dragão Stadium nung Club (final asayar team ana) shia nungi fans 6000 tashi melatsü terenemba lir.

"Portuguese FA (FPF) aser Portugal tekolakpurtemi asayatsü melar asünung, May 29, 2021 nü Estádio do Dragão, Porto nung Manchester City FC aser Chelsea FC na tsüngda UEFA Champions League final asayatsü," ta UEFA sangdong ka ajanga metetdaktüsü.

Iba final ya mezüngbo Istanbul kübok Atatürk Stadium nung asayatsü renem, saka 'COVID-19 travel' red list nung Turkey adentsü UK Sorkar indang telemteba ajanga, iba tesem nung final asayara, asaya repringtsü atema club indang domestic fan tem marutetsü. Stadium balala nung terepranger ka danga marudaktsü kum ka süia aruba sülen, final asayar team anaprongla indang tereprangertem arudaktsü asoshi UEFA-i asalentong

yanglua liasü.


"UEFA-i iba final asaya England-i belener aotsü asoshi jembitepa liasü, saka Football Association aser tekolakpurtemi iba atema meranga jembia, UK nung quarantine agitsüsa akumba ajanga iba sentong mekoktet," ta sangdong nung

shia lir. Iba telemteba sangoktsüba mapang, UEFA president Aleksander Ceferin-i, "Tesüiba kum asenok ajaki ajangshia aruba ama iba ama tensa ya ano kum jungnüa majurutsü imlaa atar aser iba nung ajaki mulungteptsü ta bilemer," ta ashi.

"Fans temi pei sapuba team asaya ita 12 dak tema Stadium nung repringtsü maongka mengui aruogo aser Champions League final tongtetba ya football club atema kanga dang tongtibang lir. Tsüngdong aruagi pei pei sapuba club pusema aser asaya repringtsü asoshi fans melatsü sentong meliasü, saka iba final asaya repringdaktüsü lenmang ka ngutetba atema pelar," ta pai ashi.

"Kum ka tashi fans temi Stadium nung asaya mereprangi arema arur sülen, iba season indang asaya tulutiba nung pei sapuba team pusema asaya repringtsü maongka magutsüra aji kanga dang tai," ta Aleksander-i shisem.

Season tembangba sülen club toktsütsü: Zidane



Championships tembangba sülen Germany coach mapa toktsütsü.

Honibarnü Zidane-i, pai club toktsütsü ama jembioigo aser ashiba agi, "temelenshi bener arutsü atema mapang kar aruru."


"Temela asüba agi ni toktsür masü. Ni toktsür aotsü aser meyipa merpringtsü ta masü. Mapang kar nung na dena alitsü nungdaker aser khen khenbo temelenshi bener arutsüsa mapang agi bener arutsür. Ajisüaka aji ni atema dang masü saka ajak ajangzüktsü atema lir," ta Zidane-i ashi.

Paisa, asayatem atema tajung dang jembioigo aser parnok den tesendaktep ya akhümtsübu dak amendaker lir aser parnok den külemi inyakba ya teti bilemtetsü, ta ashi.

Tepila ojembia ama angateter ta asüngdangba mapang Zidane-i, "nia kasaji dang shitetsü. Kechi ataloktsüar nia memetet. Ni tang idaki lir aser asüng onok asayatsü. Iba sülen onok asaya ka anungtsü," ta ashi.

Real Madrid pur tang La Liga nung Atletico Madrid dang nungi point ana agi tajemba lir ajisüaka Atletico Madrid-i Osasuna kokra parnoki asayamung kokatoktsü.

Kobe Bryant Basketball Hall of Fame nung züngoksemogo



San Antonio Spurs nungi nungtu asayar Duncan, Minnesota Timberwolves aser Boston Celtics nungi Garnett, anaben tashi NBA championship bener aliba coach Rudy Tomjanovich aser WNBA legend Tamika Catchings nunger Honibar aonung züngoksemogo.

Iba sentong ya Uncasville, Connecticut kübok Mohegan Sun Resort and Casino nung anogo ana agi, kong Vanessa Bryant aser Kobe'er jala tantsüla Natalia nati Hokolbar aonung Bryant indang Hall of Fame jacket aser ring agizükba liasü.

Bryant aser tanga asayatem ya Hall of Fame 2020 class atema shim, saka Covid-19 wara pokteter aliba ajanga parnok züngoksemba sentong thinena atatsüsa akum.

"Kobe ama shinga matoktsü. Kobe ya khenyongi balaka liasü. Pa court tema nunga kanga ajemaluba takum ka liasü," ta Vanessa-i ashi.

NBA legend Michael Jordan-i, Kobe aser coach Kim Mulkey na present sütsü.

"Pa aser Gigi na iba tetushi agizükba nung shilem agitsü langa lir. Tebu Hall of Fame nung züngoksemba atema Gigi kanga nema tangla," ta Vanessa-i ashi.

Kobe ama Garnett-a high school nungi indang indanga NBA-i ao. Garnett-i, Duncan aser Kobe na akhümtsübuba aser nükshia repringba indang jembia.

"Ni na kanga tushir," ta Garnett-i sabang nungi Duncan dang ashi. "Nü den külemi Hall of Fame nung züngoksemba ya tetushi tulu. Na aser Kob," ta pai ashi.

Garnett-i, Minnesota, Boston aser Brooklyn nungi season 21 asaya liasü.

"Minnesota nung asayaba mapang championship ka danga mekoktetba atema dang sasaa bilemer. Ajisüaka ni ashiba ama Minneapolis tanaben yanglushitsü yongyaa atar," ta Garnett-i ashi.

Duncan, NBA-i ili rookie of the year award angu aser iba sülen taruba kum NBA title mezüngbuba akok.

"Ni takum nung tang ama kodanga nervous mesüdang. Final, game sevens aika ajangshioigo saka tang ama kodanga nervous mesüdang. Ni kü takdang nung anogo tepeyong mesüngjemteti kazüogo," ta Duncan-i ashi.

San Antonio Spurs nungi season 19 asayaba mapang asaya shia Duncan indang average ji 19.0 points, 10.8 rebounds, 3.0 assists, aser 2.2 blocks liasü.

Monupii/May 16, 2021 (Agencies): Spanish media sangdong balala ajanga Deobarnü ashiba agi, Zinedine Zidane-i asayatem den season tembangba sülen pai club toktsür aotsü sentong aliba lemsatepogo.

Onda Cero radio aser Goal online sangdong ajanga ashiba agi, France nunger coach, shiba indang contract 2022 tashi lir, pai hopta ka tejakdang pa indang asayatem dang pa season tembangba sülen club toktsütsü ta shiatokogo. Goal-isa, "coach-i taoba Honibarnü Sevilla den Deobarnü Valdebebas nung iba osang agüja liasü," ta ashi.

Kasa mapang nung Onda Cero osangbener Fernando Burgos-i, Zidane melentsüpurtem rongnung taoba Juventus coach Massimiliano Allegri, ex-player Raul Gonzalez aser Joachim Loew nunger densema alitsü akok ta ashi. Joachim-i, European

BILEMDANGANG

"Auer dak alaka minyak ayong ayonga chiyonga aliba nisung shinga mali."